

臨榆縣志

卷二十一
卷二十二

臨榆縣志卷之二十一

事實編四

鄉型下

忠烈
僊釋

文學

附流寓

方技

明

張世忠字顯甫別號平山山海衛人貌不逾中人而神爽英發總髮時以世冑育膠庠隨襲副千戶嘉靖五年丙戌登孫堪榜武進士由世職增二秩爲署指揮僉事尋掌衛篆有清幹聲遷秩守備天壽山歷陞山西大同中路參將拒寇丁家莊有斬獲功授正千戶世職偶緣邊事罪誤聽勘回籍未幾西陲告急兵部疏名上請特命守偏頭關關兵頻年失利人危之世忠躍然曰此吾報國之秋也嘉靖二十一年七月俺答大舉入掠潞安平陽飽去屯祁縣世忠與副總兵段堂遊擊張文懿參將何堂劉維禰合五營兵襲之至陸支村段堂軍潰文懿等引避獨世忠率麾下千人挺身血戰自已至酉矢石俱盡敵且增騎合圍射世忠殫其馬獨跨墻對射首中二矢死事聞上憫悼賜

祭葬贈左都督諡忠愍陸支村山海關俱建祠享祀復崇祀忠孝祠

參錄
明史

李國棟本衛指揮體貌豐偉膂力絕倫萬歷間從杜將軍松出塞與清兵渾河大戰歿於陣以功贈都指揮僉事子鳴岡襲廕祀忠孝

李國梁本衛指揮從杜將軍松渾河大戰歿於陣以功加升都督指揮僉事祀忠孝

邊萬里山海衛百戶以都司管中營事崇禎己巳入衛京師行至薊州五里橋敵兵掩至據橋大戰自未至酉身被重創力戰死祀忠孝

呂鳴雲本衛舉人鳴夏弟武健才勇以守備爲揚武營中軍崇禎庚午守永平城破戰死追贈遊擊將軍祀忠孝

楊開泰本衛百戶永郡失守以本路把總帥兵偵探至榆關西遇敵對射良久衆寡不敵死之祀忠孝

楊廷棟本衛百戶少以勇力稱爲揚武營千總共守永平城破猶然礮奮擊卒不能支死之祀忠孝

蔡國勳本衛千戶帥兵恢復遵化偵探遇敵奮勇直前戰歿於陣閣部孫承宗題卹贈指揮僉事祀忠孝

嚴大寬本衛千戶從總兵趙率教應援遵化遇敵與戰主帥亡衆大潰大寬力戰不退死之祀忠孝

楊呈芳字桂林本衛恩貢授河南魯山令丰容偉幹居官平易時土寇蠭起與衙胥結通芳知事不克濟冠帶坐堂上賊環侍不忍加害出入數四始戕之爲具棺殮停喪後其弟往收其屍經年啓視貌猶如生事聞贈汝州知州祀忠孝

李友松字赤仙衛庠生性剛毅有學識崇禎甲申春流寇薄城勢甚危急松慷慨倡義率庠生高輪轂譚邃寰劉泰臨鄉耆劉臺山黃鎮菴赴營說賊緩軍遂遇害然城卒賴以完清錄功廕子棲鳳爲貴州思州府經歷祀忠孝祠

志

俱舊

清余一元哭李赤仙二律有序甲申之役流寇陷京師平西伯中途聞變

旋師山海各官星散寇氛日熾聲言攻關甚急維時內無軍需外無援旅
人心洶洶不保朝夕余友茂才李赤仙倡義同高輪轂譚邃寰劉泰臨三
茂才劉臺山黃鎮菴二鄉耆願身赴京師說緩師行至三河卒與寇遇乃
羈六人於營至關與平西接戰竟日次晨清兵至寇遁去赤仙與四人歿
於軍高輪轂亦余友也身被重創幸免得歸錄功授縣令陞郡丞赤仙暨
四人無聞焉是冬其嗣傅天翮升文祥輩製櫬招魂葬於其祖塋側余爲
作詩以哭之曰十八年前天地更書生走馬赴軍營但求問鼎干戈息豈
料焚岡玉石傾草木含悲朝日慘邱園隱恨暮煙橫賢郎製櫬招魂葬淚
灑臨風故友情憶昔同遊幾歷年誰知中道運顛連先聲已致敵兵遁左
袒誰持將令宣興漢莫伸紀信績破齊難保酈生全諸郎繼起皆英雋福
善冥冥應有天

清程儒珍關門舉義諸公記珍嘗聞之父老云國初關門舉義時鄉先生
八人實爲之倡至今稱八大家云八家者李譚高劉曹程馮呂也然考當

時共事者實十有一人蓋八人外尙有余劉黃三先生焉閱縣志僅李赤仙高輪轂有傳余公雖有傳而未及舉義事李赤仙傳中雖叙譚劉四人而馮呂曹三公及珍九世伯祖印古公無聞焉憶幼時檢書舊篋得余潛滄述舊作五首哭李赤仙二首及諸公上墨勒王揭紙雖朽蠹而字猶可辨載當時原委甚悉崇禎甲申四月吳三桂奉詔入援兵五萬人號稱十五萬進至玉田聞京師已陷旋兵山海關召邑中紳士與議諸公以大義勸之於是南郊閱兵凡一切措餉城守事宜衆慨然任之歃血定盟遣人東乞王師又遣人給賊緩師緩賊者爲李友松譚遂寰高選劉克望四庠生劉臺山黃鎮庵二鄉耆行至三河遇賊遂羈於軍四月廿一日賊至山海關營於石河之西遊擊全城下城中兵出迎戰挫其鋒是日王師適至駐關外威遠臺出迎者爲庠生曹時敏程印古馮祥聘呂鳴章其一則舉人余一元也見墨勒王賜坐賜茶款接溫藹偕范文肅公入城曉諭軍民人心益奮明日昧爽王師從一片石入賊偵知迎拒我兵亦從城中出夾

攻城守者遙助聲勢賊馬步二十萬胥敗走我兵七戰七捷賊棄輜重西奔給賊者惟高選乘間出走賊追之被創遇大軍得全餘皆遇害此當時諸公之事亦關門創建以來一大舉也乃功績攸同而顯晦有異豈以說賊難而乞師易歟然秦庭之哭卒報深仇魯連之謀終成偉績逆闖自猖獗以來未有若斯之大歟者是雖皇朝應運而興而閭邑之所以保全諸公皆與有勞焉是烏可任其泯沒而不爲之表彰也乎

穆其元應役於石門路從參將陳愚在花桑峪口外隨剿陣亡

採訪未叙朝代職官志石門無

參將更無陳愚之名清石門亦無兵警惟明有游擊陳愚齊元或是明人附於明末以待識者

清

馬維熙字天御本衛籍由拔貢錄功授忻州同知署偏關西糧廳篆值姜鑲之變山右一帶搖動偏關閣城從叛熙不屈囚之別所遣人守伺久之守義愈堅遂加害事聞贈忻州知州祀忠孝祠

呂鳴夏字九三本衛籍明萬歷乙卯舉人天性孝友弟鳴雲歿於王事遺孤幼

稚撫訓成立輿論重之初仕清豐教育繼補束鹿訓課有方升眞定郡丞分駐宣鎮以抗直取忤挂冠歸里明末賊逼關門夏家居從衆迎攝政王殲寇及清定鼎錄功補授河南衛輝知府時天下初定撫安百姓政績稱最遷僉事備兵固原值降將伍大定等謀叛以兵脅夏不少屈歷數其罪罵不絕口遂遇害敕賜祭葬贈光祿寺卿廕子祀鄉賢祠尋復入祀忠孝祠乾隆二十九年崇祀京師昭忠祠

趙世泰北部副總兵應元子歷任河南鎮標參將率兵剿寇戰歿於軍

張朝臣字鼎望康熙庚戌武進士任浙江處州協都司四十七年遂昌土賊作亂臣帥衆往剿至其巢林木蒼蔚山路險窄僅容一騎左右曰崖高路狹曷退徐爲後圖臣曰吾受朝廷寄顧見賊而走耶見賊而退不勇臨難而避不忠遂身先之被創墜馬徒步力戰猶手刃數人死事聞贈都司僉事加一級賜祭葬廕一子衛千總崇祀忠孝祠

俱舊志

計宏謨乾隆丙子丁丑聯捷武進士初任山西大同府陽和營都司陞授湖北

竹山營游擊從將軍阿文成公桂征金川與賊戰陣亡

見邱抄

倪鵬由監生捐縣丞分發四川署榮縣縣丞丁憂歸服闋借補布政司照磨乾隆三十七年大兵剿金川逆匪委赴西路隨督轅聽差三十八年木果木之變登春失守遇賊被困死之事聞贈鑾儀衛經歷資白金一百五十兩祭葬

崇祀忠孝祠

見李金衡
金川瑣記

海齡鑲白旗駐防嘉慶十五年由驍騎校以守備用歷升宣化大名鎮總兵古城領隊大臣京口副都統道光二十二年逆夷犯鎮江齡禦敵力盡死之城遂陷妻李氏次孫長安同殉奉諭該副都統爲國捐軀洵屬忠義可嘉著加恩予諡昭節照都統例賜卹賞給騎都尉兼雲騎尉世職事實宣付史館入祀京師昭忠祠該地方官建立專祠伊妻及伊次孫一併附祭並著派員尋獲屍身妥爲盛殮護送回旗賜祭一壇翰林院擬議碑文祭文以彰忠藎等因欽此並賞長子戶部主事伊蘭太爲員外郎次子伊琛太爲藍翎侍衛長孫清安承襲世職

見邱抄

譚光斗武庠生入山永協右營効力以額外外委隨征揚州髮賊屢戰奮不顧身咸豐三年春攻揚州城左股中傷旋復獲勝升經制外委署理把總十一月十六日隨提督陳金綬分路截剿瓜州賊是日風沙迷日本營都司葉舒青被圍餘兵逃竄光斗力救不克隨舒青死之奉旨贈千總賞雲騎尉世職子琳應承襲

見邸抄

趙永慶武生充山永協標馬兵從譚光斗征揚州髮賊打仗陣亡

王保庸字湘舟增貢生少孤母教嚴得成立遇事識大體族黨有疑難恒就取決道光丁酉就通判職欲以宦遊娛母志未遂而母卒咸豐元年除江西吉安府通判二年粵匪窺吉安西陲奉檄堵禦時有逃勇煽惑土匪乘勢虜掠保庸嚴緝之民心乃定遂分屯兵勇於蓮花廳永新縣諸險要吉南道周玉衡稱之曰得此人守吉安江右之圉固矣賊知防嚴未敢逼北陷九江據金陵而吉屬安堵三年泰和土匪圍郡知府王本悟出戰死之保庸行府事圍以解督率義勇勦緝餘寇殲除無遺購得王本悟首續檀爲身界其子歸葬

爲建祠於郡巡撫張芾以兩定吉安功奏請賞戴藍翎又隨刑部侍郎黃贊湯勸辦捐輸出力加同知銜五年粵匪由袁州大至奉委守永豐門與新升臬司周玉衡等四十人戰守六十餘日六年正月二十五日糧盡援絕城陷死之事聞以實任同知賜卹給雲騎尉世職附祀吉安周玉衡專祠並京師直隸鄉祠同治三年崇祀本縣忠孝祠光緒十九年江西巡撫德馨奏准賞給候補知府即照知府例賜卹

見邸抄及行述

清郭長清湘舟先生傳云先生姓王氏諱保庸字寶符湘舟其別號也世居直隸臨榆縣曾祖永吉武庠生祖壽三乾隆庚辰舉人累官戶部主事父士銓郡庠生先生幼而穎悟能強記十三歲而孤母程太宜人爲延名師於家塾兼使慎交遊先生奉教爲謹弱冠入邑庠以異等補增生行豪爽爲文不屑尋行數墨好讀史鑑喜談兵每把酒說古戰守事瞭如布碁三應鄉舉不第援例就通判職旋丁母憂家居十餘年以教子爲務咸豐元年辛亥子定元舉於鄉先生亦選授江西吉安府通守時粵匪擾荆南

江省偏近衡湘議者難之先生獨毅然而往二年春抵任其職糧鹽總捕水利以次脩舉夏楚氛告警奉贛南觀察周公玉衡檄協候補守林君懋勛防堵蓮花廳永新縣等隘秋八月林君旋役觀察以蓮永爲江右門戶且路徑幽僻賊蹤出沒無常知先生任事精勤遂請於撫軍檄先生總其事九月賊由長沙東竄茶陵攸縣皆擾蓮永人心搖動先生總其事統漕標兵二百名合各鄉團先於城隍界九路衝各隘口分施守禦自率兵勇西至楚界勘地勢據險置防還駐蓮花廳居中調度將西陲形勢及屯扎守禦方略詳稟觀察周公批云據稟相度地勢安置守禦深合機宜該倅素稱練達向顧大局務期督率兵勇盡力嚴防始終不懈勿令內竄則蓮永無虞而江右之圍固矣觀察旣知人善任先生益自淬勵備戒綦嚴賊不敢逼遂北竄岳州此即下長江據金陵之賊也三年春正月吉屬解嚴先生旋署秋七月泰和土匪由萬安撲郡太守王公本悟銳欲戰先生謂宜固守觀釁然後擊之太守不聽歿於陣時先生居守飛稟觀察周公遂

奉檄權府事日夜登陴督師守禦屢次斃賊時亦出擊之賊乃不敢急
攻八月朔羅忠節公來援破賊白鷺洲郡圍始解撫軍以先生守城功聞
於上賞戴藍翎先是太守戰歿賊揭竿懸首薄城衆皆惶懼先生以重賞
購勇士獲歸其元續檀爲身殮之痛哭誓衆以固人心死守二十餘日卒
保危城解圍後先生以爲賊雖退而防不可疎乃練義勇設保衛局於城
外十月卸府事回本任仍統保衛局如故五年八月粵匪由湖南竄入永
新逼安福郡城戒嚴參戎柏君戰不利太守陳公宗元請救觀察周公至
郡進剿賊逸而西十月復東陷袁臨二郡南逼吉安十一月二十日遂圍
城時周公已陞臬司督率員弁力守待援先生守永豐門調保衛局義勇
入城率同幕友家丁登埤城中鹽燭柴炭皆缺人食淡飲冰夜則黑守十
二月初八日地雷破西月城先生協太守督戰退賊搶修缺口論功以同
知補用時賊據臨江省垣隔絕求援十八次不至六年正月二十五日賊
乘連日大雪暗穿地道毀城西南隅突而入先生巷戰被執罵賊而死幕

友張滋程虎炳家丁譚鶴齡王福王文貴皆殉傳聞士民竊其首瘞於校場之偏是役也在事文武自臬司周公與太守及先生以下各官四十人殉難事聞皆膺卹典先生以同知賜卹給雲騎尉世職附祀吉安周臬憲祠並入本邑忠孝祠惟遺骸則難覓矣論曰今之通判古之別駕也史稱龐士元非百里才宜處置中別駕之任是其職可試長才而顧以閒曹目之乎湘舟先生之佐郡也外則防鄰寇以捍巖疆內則應倉卒而堅衆志計其生平好談將略夫豈空言無實者歟若夫爲國捐軀有卹典以酬忠節在先生固自無憾獨惜乎安內攘外之才未竟其用也悲夫

清蘭士元輓王別駕云
鰲長驅薄江右鶴唳風聲雜刁斗
吉州荆楚之咽喉幾度揮戈苦戰守
蓮花廳外劒花飛公以別駕主戎機
胸中一柄鐵如意指揮士卒揚軍威
潢池又奮螭螳斧月黑霜沈震軍鼓
烽火夜照青原山太守撓鋒死報主
倉卒檄公護黃堂撓城百計迴忠腸
三千練甲群醜懾磨奔豕突離巖疆
孤城甫遂回天志復有子奇張僞幟
夜草軍書一

騎飛張鎬援兵猶未至黑雲壓陣孤城寒羅雀掘鼠爲民餐杖節巡城氣
自壯撼山猶易撼心難城陷諸軍弔猿鶴不關戰枰失先著廣廈難憑一
木支閃閃大星西江落天南忠義達宸垣獎卹均霑聖主恩大將睢陽公
則許無慚賚典及子孫小儒侈口談經史昂藏自負奇男子臨變撓心轉
愛身千古艱難惟一死紫陽大義公淹通酒酣議論皆生風一朝致命償
素志大節巍巍山岳同戰場憑弔江頭月傷心最是鵑嘯血士民墮淚峴
山碑何處青山葬忠骨遠覓親骸至性成賢郎株樹繼家聲忠魂異地歸
來些早慰槐庭孝子情

清王樸題湘舟宗弟行述云王陽爲孝子王尊爲忠臣忠孝能兩全自古
難其人吾宗者畸傑倜儻由性眞讀書好讀史讜論開群倫少依畫荻訓
領受思閭閭長誦采蘭詩惟彼南陔尋豈無遠遊履歸期不逾旬豈無功
名志進亦爲娛親如此三十年何其孝之純一痛風木悲忍淚營窀穸永
感泣終天降鑒通明神國家值多難粵寇恣狂猖朝議選干城檄取官江

滑一官未爲榮王事無退遼賢郎舉京兆留赴春爲新鳴騶乃先發行人
吉安春地處江右衝楚境相與鄰下車他未遑耆舊先咨詢果然蚩尤旗
直搗湘湖濱羽書下吉郡整隊屯要津武庫原在曾臨事協恭寅分兵控
險隘布碁羅星辰繪圖達上游時譽推璘珣先聲卻狂敵不敢窺域畛迂
道旣遠遁始得籌安民無何荏苒起猖獍來黃巾太守嗟戰死護戰思張
巡倉卒權劇郡城已攻圍頻未免猿鶴驚能令鵝鸛馴且戰且防守壯志
淩霜晨妖氛值阻喪黑夜爭奔跋大力保危城能名達楓宸九重獎賢勞
三錫垂恩綸冰銜漸已崇感激深無垠意其發軔初已捐七尺身賊從西
北來驀地堆烟塵長吏盡登埤適人以鐸徇晝夜分巡羅三令加五申省
垣路雖梗豈忘齒與脣可憐告急書誰稽復誰因旣無信陵援絕少周郎
困連年苦鋒鏑餉絕民亦貧而况滔天寇九市圍城闔如以湯沃雪其能
救湮淪然而疲憊餘軍服猶振振奮臂時一呼驚脫西山颯月城轟已破
搶築成完堙拒守逾兩月妖星大加憐吁嗟四十員赴義偕從賓藉非誓

丹誠焉得同日殉卹典建崇祠千古答明禋王褒有詰嗣一卷行述陳字
字杜鵑血對我長吟呻奮筆紀忠孝留取垂貞珉

清上元何侍御桂芬輓吉安通守王湘舟先生二十四韻云舉世尙節義
志不在人知皇恩特廣被旌表先患遲忠魂與毅魄成人無尊卑乾坤存
正大浩氣與之彌狐死必正首豹死必留皮人豈不如物授命在見危王
君守吉安算勝謀亦奇四郊值多壘慷慨獨誓師水陸備籌畫士卒聽指
揮傷哉功未建羽檄各奔馳臨難勿苟免跡近默與痴痴默本何用名教
賴扶持耿耿如鐵石百折身不辭但求配道義肝膽不必披但求完名節
闡揚非所期馨香報百世立廟與建祠生民崇直道婦孺感拜追一點忠
心血山嶽重難移一滴眼中淚風雨淒生悲田橫盡壯士致身早不欺名
成高萬古四十賢人隨生氣與生理兩者存無虧盤錯足遂志逢比即臬
夔光爭並日月竹帛芳名垂

清宛平桑尙書春榮贈同知吉安通守湘舟王公輓辭云羽書何倥傯妖